

928
セ
23

誠

齋

集

二三



誠齋集卷第九十六

廬陵楊

万里

廷秀

雜著

冊文

代梁丞相作

壽聖齋明廣慈備德太上


皇后冊文

維淳熙十二年歲次乙巳十二月一日庚戌朔

皇帝臣謹替首再拜言曰臣聞五三六經若替天

則勅叙人紀罔不上昭帝猷內融母德與情載相

永與曦朏相輝是以書首堯典詩首周南蓋降義



迄黃肇允而未具娘武狄胤若淑而靡隆君子於是乎謂帝道莫盛於唐堯母德無加於文母也然上下千載相望遙遙若夫堯父文母生同昭時參天兩地壽儷太極如日斯升如月斯常俾手如今日之於鑠者復哉不可得聞已德日新壽日新則鴻號領聞又日月新顧可挈而不熙哉恭惟

光堯壽聖憲天體道性仁誠德經武緯文紹業與統明謨盛烈 太上皇帝陛下皇建渾淪再造穹窿更生肖翹重輝宗祐固天縱之聖神武文叡聰徇齊又多績也厥亦惟我 壽聖齊明廣慈太

上皇后徽懿淵穆惠和靜專實左之右之輔之翼之在河之洲言采其荇關雎之所以風天下也在敬以思謙恭以早思齊之所以垂徽音也為俗之俗薄澣之服葛覃之所以化婦道也至於求賢如卷耳逮下如摻木化行如兕豷由身而家由家而國由國而天下母也克仁繫 光堯有不殺之武母也克儉繫 光堯有月損之道母也克遜繫 光堯有黃屋非心之聖惟父惟母同道一德惟齊惟鈞光施冲人恩被函生格于皇天自天壽之有永無艾臣敢不消選令日彤飾上儀躬率百工增

崇顯名用答揚二親之光訓蓋聖善壽祺言之不足我
是以有明慈之稱光明宣慈言之不足我
是以有齊廣之稱乃齊乃廣言之不足我
是以有備德之稱且厚以持載博而能化德也貫三為一龍六
為八備也衆美會焉萬善叢焉德行純備視周之
大任無所與遜臣不勝大願謹奉玉冊金寶加上
尊號曰 壽聖齊明廣慈備德太上皇后伏惟
殿下同堯之天合堯之日對越大養於萬斯年復
無無極燕翼右序以篤 宋祐以祿于萬嗣臣誠
歡誠抃稽首再拜謹言

詞

給太學士人綾紙詞

牒某人成均材之圃也言執其苗言擷其秀既曰
擷之曷不藝之士之人於斯出於斯有碩其用者
相踵也庸非國家養士之仁乎有養士之仁有自
養之仁徃者毋怠事須準勅給牒充太學生故牒
議

光堯太上皇帝謚議

某聞聖人之孝莫大於尊親尊親之至莫大於愛
之以德吾如是而尊之吾親可以受之受之而安

居之而無疑是之謂愛之以德不然極吾之所欲
尊而不顧吾親之所不欲受豈所謂愛之以德乎
昔魯之閔僖兄弟也然閔公先君也僖繼閔者也
而文公乃躋於閔之上文公知尊其父而不知嗣
其父於非禮之地是則尊其父者陷其父也故春
秋書之曰躋僖公譏之也至定公而逆祀始正故
又書之曰從祀先公嘉之也然則議者欲尊

大行太上光堯皇帝為祖無乃近於躋僖公之類
乎兄弟且不可而父子則可乎恭惟 太上光堯
皇帝以上聖之資當艱難之運而能撥亂世反之

正皇建太極再造兩儀更生烝民重立 九廟

中興之業巍蕩遂古至於回龍輔於永祐承太母
於慈寧偃兵息民涵育溥博和戎靖國方內密如
紹興辛巳逆亮叛盟戎路一征兇酋自斃功成不
處斷自 天衷褰裳去之以授 聖嗣駿功丕烈
赫然如彼道隆德茂卓然如此其視光武無所與
遜皇乎我 宋丕天之大律不可貶已尊而為祖

何不可者然恭取漢而漢亡則先漢至平帝而終
光武取恭而漢興則後漢自光武而始國自我始
謂之祖可也光武之於平帝光武所不得而父况

非受之於平帝之於光武平帝所不得而子况非
授之於光武親則非父子也世則非授受也謂之
祖可也今我 光堯親則 徽宗之子也位則
徽宗之授也稟父之命傳父之位至於 廟號父
居其前同 列聖而稱宗子居其後異 列聖而
稱祖 光堯之心其安乎哉揚雄曰孝莫大於寧
親寧親莫大於寧神尊其號而使其心不安其神
不寧可乎今申命公卿大臣議即博士僉甫而進
質之於天蓋亦無變稱宗之制而獨求極尊之謚
庶幾下可以稱 吾君愛親以德之美意上可以

安 光堯左天之神靈也謹案謚法窮神知化曰
聖一民無為曰神克定禍亂曰武修德來遠曰文
禮文法度曰章繼志述事曰孝夫自天生德聰明
仁儉不曰聖乎內嬪 聖子獨觀昭曠不曰神乎
赫聲濯靈風揮日舒不曰武乎投戈舞于裔夷用
賓不曰文乎刺經作制與滯舉偏不曰章乎宗廟
再安祀 宋配天不曰孝乎昔 帝堯之德乃聖
乃神乃武乃文煥乎文章堯之章也親睦九族堯
之孝也惟我

太上異時尊號于堯有光厥今易名備堯六德勒

崇垂鴻金聲玉振於是為稱若夫高者天德之稱也致崇極之謂也詩曰莫高匪天又曰謂天蓋高惟高之一字乃盡乎天德惟天下之至聖乃配乎天德於赫太上其道高乎九皇其功高乎二典其壽高乎五三六經之傳豈惟堯而已矣非天德其孰能當之 太上光堯皇帝尊謚宜天錫之曰聖神武文章孝皇帝廟曰 高宗謹具申尚書省伏乞照會謹狀

葉恭簡公謚議

名義問
字審言

議曰天下有名教聖人有天爵政教莫大乎誅賞

而誅有不及於隱隱人爵莫顯乎公卿而爵有不法於幽光謚也者其教不以政而以名其爵不以人而以天者也一字之褒死而不忘片言之貶百世不改是以君子貴之樞密葉公既薨其子某請于太常考其行實稽古之謚法法之所與也謹案謚法不憚于位曰恭正直無邪曰簡合是二者可以易公之名矣公何以謂之恭也紹興之季年虜酋敗盟寇我疆場有為右相而受命督視者遂巡畏避竟不肯行公入對毅然請行 太上皇帝玉音慰諭且謂卿能為朕復何慮大抵緩則食其祿急

則逃其死為臣如此懈孰甚焉公遇大難而以身任之可謂不懈于位矣是以謂之恭也公何以謂之簡也公自為少吏而上疏論時宰之姦邪以取免官之譴及執法殿中則論執政之垂愎必使釋位而去且謂君子當長養成就使之有立小人當芟夷蘊崇勿使能殖可謂正直無邪矣是以謂之簡也請謚曰恭簡謹議

節使趙忠果謚議 名士跋

議曰身與義孰重曰義重志與功孰難曰志難古人不以天下易兩臂蓋以身重於天下故也然身

不可殺乃有殺身以成仁生不可舍乃有舍生而取義君子是以知天下至重之器在義而不在身古人不以九合易一死蓋以功難於濟世故也然以其君霸者或有比之而不悅以其君顯者或有耻之而不為君子是以知天下至難之業不在功而在志故節使趙公奮至難之志而不懼捐甚重之身而無愛功雖不就義則獨高矣矧公神明之胄宗室之美乃與上古之伏節死義者爭日月之光凌雪霜之嚴是歲寒之松生於高宗之景山疾風之草生於文王之靈囿也詩不云乎豈無他

人不如我同姓議禮者當正色而謚之夫何疑焉
公在靖康之間憤金虜之弒宗國之屯結豪傑三
千人以赴京師在建炎之間復結義士數千人欲
為 朝廷取河北竟以謀泄虜人執之斬腰於市
嗚呼痛矣謹按謚法殺身報國曰忠犯衆所懼曰
果公之志欲取河北於既陷之後不亦犯衆所懼
乎公之義能捐一身於衆人貪生之日不亦殺身
報國乎宜以忠果為謚謹議

策問

太學私試策問

問錢之為物飢不可食寒不可衣然非天下之無
用無以行天下之有用是以假之也嘗怪鑄之自
於古積之至於今日者不足繼之以鼓鑄鑄之不
足繼之以楮券宜其為錢不勝其有餘也而反愈
不足夫錢之與物無兩重亦無兩輕此賤則彼貴
彼低則此昂也今則錢與物兩貴其各安在或謂
以楮為之其數十而其用八非細民之便此其所
以敝也然行之於益州未聞如是之敝彼何術也
或謂以銅為之其費不貲蓋與鉄者兩行乎議者
曰鉄非銅比也不久且毀有鉄之費無泉之利無

以為也然其物也益州亦用之又何歟放鑄可為也其如權去公上何且楮券之偽者民猶病之放鑄可為不可為也禁其銷則錢不毀禁其泄則錢不耗是二者固載之令甲矣然銷之者無藝泄之者不貲何其自若也或者曰昔者孟子不言利不知夫五雞二彘之育孟子所不忽也何必曰利孟子有為言之也信如或者之說則王衍亦孟子歟不然時之所憂庸得不憂民之所病庸得不病諸君獨無意乎美言不補竅言無施諸君必不為也願悉解有司之惑將有擇焉

省試別頭策問

問道與德可勉而能才不可強而致此蘇氏之論也德勝才謂之君子才勝德謂之小人此司馬氏之論也由前之語則先才由後之說則後才兩從則戾一從則孰歸或曰蘇氏駁才權司馬氏粹乎經權則多充經則寡悔信斯言也仲尼之所謂才難不尚才哉舜之五臣周之十乱不用才哉且司馬氏之說曰正直中和之謂德聰明果敢之謂才然則才與德之分也昭矣及觀傳稱高辛氏高陽氏之才子則曰忠肅恭懿又曰齊聖廣淵傳之所

國而濟登茲焉者可也然說者必曰秦以如此始亦
奚天下不悅之恤乎兵與刑以為吾可以就有就則亦
擊撻其政以歸乎德而嚮乎功一用權勢法制以驅其民
無二而所就者不一何也於是秦人監之繼道以
未離於唐虞之所傳而其德非違於道也所傳者
周而不自知其將歟抑之而歟不敗歟且其道
用此以治魯而君子已年自是而後周矣周公用於
之戰亦倚於兵寢之年自是而後周矣周公用於
於天下豈矣然呂刑之歟已伏於固空之目春秋

成王以治周者豈形於心忠身決於物禮樂陶
阜也及樂以是傳之三而堯曰成功樂曰觀周公其
之彌約而雍熙之彌堯曰成功樂曰觀周公其
嘗怪二帝之治執中而光被之彌堯曰成功樂曰
乎道周人粹乎德秦人粹乎術漢人駿乎術與德
謂之術就乃謂之功三其就一也唐虞氏粹
問趨治者固多途經乃謂之道維乃謂之德博乃

大學上舍策問

矣於此何嚮有司將觀德焉
謂才乃司馬氏之所謂德也又何歟諸君且用世

以此終其信然耶抑評以成毀而不以工拙乎夫成毀之興工拙此二事也秦果工於為國則不以毀廢功不以人揜技也且其後之毀庸知其不有由歟抑其所以毀者果出於其所以成者歟於是漢人監之高文創守以寬厚公恕之治與天下為清靜和樂之事然漢無秦之術而亦有秦之功朽貫紅粟白老兒嬉秦未必有也南越請服匈奴和親不為秦之強而亦不至周之弱武宣繼之則又不然曰高皇帝遺朕平城之憂曰何至純任德教周周政乎二君之治蓋出乎秦人之所謂術者矣

然一以之虛耗一以之中興事同而功之異此又何也且夫道與德唐虞不得不帝周不得不弱說者曰窮於周然奚而不窮於漢之高文乎此尚有可諉者曰異世至於術秦一秦也出乎前也奚以功出乎後也奚以毀說者又曰秦之所挾者毀之具也其前之功者幸也然宣帝復用之而功則又奚說之諉恭惟主上躬發聖德統揖群元蓋將攄闡闢天地之志以不繼祖烈內修之政自治之策必有乃其全也比者紓淮民之勤蠲江湖之逋復鹽策賸立甲邵羨餘散橫歛劭農功講水澤藹

如之治登周漢而咸唐虞有月矣敢問諸君繫郤
輯不世之功則宜術之施然秦之短武之悔乃有
可懲而秦之強宣之功亦有可計欲建不拔之業
則宜道德之用然周人之弱得無可監而唐虞之
隆周漢之永又有可宗今行其三而並歟擇其一
而專歟抑外此而之他也或曰仲尼之門羞稱手
術或曰仁術不自孟氏儒術不自荀氏歟願殫議
而洽講之將以聞焉

公試武學策問

問天下安注意相天下危注意將非古也危而注

意將是寒裘雨蓑之論也故擇將在素論將在豫
嘗試歷選若昔與諸君論之或謂制勝者不穿札
破敵者乘輜車將豈顛戴鷓鴣哉然柘邑陳濤之役
山西之族哂之或又謂列兵法者皆決水轉圜之
家學裕父功者乃忠義感人之燕翼不干其人干
其闕也然長平河橋之役非將種乎彼起屠販為
爪牙何必將種乎或又謂謝病頻陽乃能平楚老
者可使也不更事少年亦能破秦可偏廢哉軍市
之租盡給士卒廉者可使也貪而好色亦得士死
力可獨取哉抑不思故將軍而失道尚乳臭而見

一誠齋集卷之六十一
輕鬻樵水歛錢帛而實燕晉斯焉取斯嗟乎將固
不易知知將亦未易若曰亡隄老臣若曰臣能平
之自鬻何嫌焉然降匈奴者即自當單于之俊困
壺頭者即據鞏矍鏢之老獨何歟或謂戰必勝之
將微信謹守鑰者疇知之勇可用之將微經濟大
畧者疇識之舉良將大臣事也然守汝州而會舉
之者誰歟此猶可諉曰文武異科將相異列也意
思深長必會萬人敵者舉之策敵制勝必武舉異
等者舉之亦各於其黨也然敏辯言兵而望風輒
潰舉之者又誰歟或曰相崇而疏將重而遠蓋親

且近者之咨乎嘻五擢之敗即中尉之門人潼關
之劔即軍容之上客旄節以賂得者有債帥之號
招討以貨取者土封丘之師又何歟擇將之難也
如此或謂君王神武則駕馭必英雄然有君無臣
古人歎之何也恭惟 主上聖武如堯勇智如湯
競烈遵晦如武王然寤寐方召旁招頗牧迺者發
德音下 明詔內而待從外而計臣令各舉偏裨
以備采擢 聖慮至深遠也伊欲謹差真材允答
隆指據旧以鑒新舍短而集長策將安出願諸君
切瑳究之將以聞焉

庚戌殿試武舉策 御題

朕以寡昧獲承 至尊壽皇之休德任大守重永
惟保邦安邊之要莫大手二柄夙夜祇懼邇求天
保采薇之治至親御鞍馬講武訓兵婁詔諸將一
意拊摩選偏裨之智勇而上之樞庭戒將帥之惰
克而察以御史 朕於軍政非不盡心焉今子大
夫咸造在廷 朕甚嘉之蓋聞古者兵制夏商而
上邈矣周家之制地方百里出土若徙者三千焉
此井牧之法也然乘馬之法一同百里出土若卒
者七千有五百焉何其異也至於諸侯兵十大夫

孟津之會侯國八百則兵之為千万者六矣而天
子之兵止七十有五萬焉財足以當十諸侯之兵
而已豈強榦弱枝之制乎至於齊之內政晉之被
廬秦之材官漢之南北軍七校樓船唐之府兵曠
騎雖曰非古亦各言其制也其因革善否可得聞
乎若夫歷代舟車步騎之異技竒正偏伍之異法
擇將者或以文或以武或以新進或以老成何塗
而得其人議兵者或仁義或詐力或祖韜畧或祖
孫吳何門而決其策子大夫講之熟矣悉意以陳
朕將親覽

嘉定元年春三月男

長孺

編定

端平元年夏五月門人羅

茂良

校正

誠齋集卷第九十六終

誠齋集卷第九十七

廬陵楊

万里

廷秀

雜著

詞疏

代宰執開啓

天申節疏

有王者興五百年而名世使聖人壽八千歲以為
春惟燎馨熏以介祉福 尊號太上皇帝伏願游
心於淡與天為徒以顯親親永綏莫大之養為衆
父父申以無疆之齡

代宰執進

天申節功德疏

於赫太上身為與子之天有開必先節屆誕彌之
月光揚頌語申行帝齡 尊號太上皇帝伏願道
心惟精德壽必得紹唐統接漢緒可謂中興億彙
日萬堯年不勝大願

代宰執滿散

天申節疏

前期一月嚴香火之彌文佳節千秋正星虹之初
度爰熙竣事告厥寶慈 尊號太上皇帝伏願齊
心大庭函氣太極二百一十載既濟中興之功八
十一萬年永膺天下之養

代宰執開啓

皇后三月六日生辰青詞

詠舞雩之風載逾蘭襖夢入懷之月有慶芷庭呻
其寶書介以純嘏 皇后殿下伏願與天齊壽合
日其明六百四十年既應誕彌之且一萬八千載
永同當宇之齡

又 皇后生辰功德疏

青燁維季載遲春日之陽紫殿有椒是生天下之
母焉依梵力喜頌壽祺 皇后殿下伏願合明日
君伴德天妹佩環而助萬乘永寧金室之居奉玉
而壽兩宮長對瑤池之燕

代宰執八月二十一日

壽聖太上皇后生辰祝壽青詞

執矩步昊適行秋之正中思齊大任符夢月之嘉
應藥篇作誦箕壽申休 壽聖齊明廣慈備德太
上皇后伏願博厚俛天光明合日玉卮萬歲長對
上皇之觴瑤池百純永膺西母之綬

為太安人醮星辰青詞

蒼穹昊昊仰止遼然黔首芸芸視之蠢爾惟一念
之既極則兩儀之不遐伏念臣某自頃入朝駕言
將母甫充負之再歲當受籍之三朝朝罷玉清從
南內萬官之後歸持栢酒為北堂千歲之歡載驚

慈顏驟膺痼疾舉闔門而無色忱四顧之疇依顛
天之心一萌勿藥之効如響久矣羈旅未之獲酬
茲焉還歸敢不盡敬召羽衣之仙侶誦藥珠之奧
篇伏望上帝下臨百神降格申錫老親之壽永庇
寒門之私

為妻安人醮星辰青詞

上帝高明遠而無極下民哀顛感而遂通伏念某
妻室安人羅氏頃及月辰遽纏災疾命已危於一
髮禱遂遍於三靈罄忱恟于方寸之間格化育於
園穹之上其應如響厥疾乃瘳既頌僕於神魂亦

兼全於母子戴天地再生之施欲報斯何薦潢汗
行潦之微於文其可乃命黃冠之侶載緒玉字之
書取蕭惟馨采藻既潔願迂仙馭下照衡閭庶昭
鑒於悃誠蒙永綏於迪吉

玄潭觀度道士疏

文江壯縣玄潭古壇別得張道陵之真傳具存許
旌陽之故蹟冶金為蓋彈壓九洲之波濤裂石淬
鋒尚餘一劍之苔蘚看管風月可無後人吹送煙
霞何受末力或倒帑廩或捐金珠斯集事之無難
亦獲福之稱是

常州禱雨疏

吏之多罪積繆政以傷和春聿唯深乃淹時而閱
雨懼首種之不入舉小民而日咨顛天有祈徼福
丕應伏願召龍震電詔山出雲雨徧崇朝霖以三
日千耜舉趾勿令東作之違時力穡有秋允協西
疇之望歲

又常州禱雨疏

時維仲夏言執其苗瞻彼大田無寸之水敢丕單
於情素以率顛於穹蒼伏念臣菲然抱虛膺此治
劇積乃繆政傷于大和荐雩崇以有祈尚屯膏而

未洽儻更崇朝而不兩則將卒歲以無秋民亦何
辜吏實多罪伏願降臣以百殃之罰以儆罔功錫
民以三月之霖來蘇此旱格于上熟慰彼群生

禱疾青詞

疾痛呼天人以窮而反本高明覆物民所欲而必
從敢瀆告於再三庶徼福於萬一伏念臣某發身
空乏竊祿滿盈上不功於王家下無補於民政不肖
老而後止乃於既止而進官君子居無求安果以
媿安而屬疾繫天賜之過分致身災之自招歲將
一周病尚未去不堪極痛屢祈死以載號仰止蓋

高何壅聞而未徹深省愆尤之積曷逃星耀之臨
敬介黃冠荐捺丹幅願回哀眷老雖罪而不刑俾
有夷瘳疾無妄而勿藥

淋疾祈禱青詞

鶴鳴九臯無微聲而不達旻閔庶類繫哀眷之必
回豈其蟻蟲之臣隔此恫瘝之訢伏念臣年幾八
秩病已再秋念萬物自遂於兩間咸各正其性命
顧六脬獨窒其一者曾不如於狗豬雖備古來刀
鋸鼎鑊之刑未足喻此疾痛慘怛之狀三醫並手
百藥罔功餘生蔑如瀕死數矣屢哀籲於玄造未

徹聞於蓋高瞑眩小瘳根本猶在肆旁招於羽客
敬展盡於血誠敢祈界祿一洗沉痾脫然去躰傲
五福之康寧大哉唯天與群生而鼓舞

箴

言箴

金乎緘則以三圭乎復亦以三前三以悔後三以
悔晦則去悔悔則去罪

學箴

為清江陳叔聲作

匪仁弗泉匪敬弗源心為之淵以安其天是心未
孰求躬之淑譬彼執麥而欲穫菽聖有六藉道之

國都立師求友徃問之塗有充於中必光於外行
與聖契言與聖會其或載筆以葩厥辭大本斯拔
何葉弗萎咨爾後學於斯盍覺惟其篤之是以告
之

官箴

大兒長孺試邑南昌辭行問政於誠齋

老人告之曰一日廉二曰恕三曰公四

曰明五日勤因作官箴以贈之曰

吏道如砥約法惟五疇廉而殘疇墨而恕兼二斯
公別無公處三者備矣我心匪通茲謂不明借語

為聰夙夜惟勤乃克有終

愚谷箴

安成劉江伯深自號愚谷益公銘之誠
齋野客揚方里 復為之箴

愚公之愚有允無誣愚溪之愚裡黠裸愚如愚之
愚愚與道俱何擇非一亦顏之徒

銘

裕齋銘

零陵嚴慶曾之齋以裕名而屬予銘之予蓋德於
狹而心於懼者也將焉取裕抑敢不銘以與吾友

共守之銘曰

肇允民尋靡哲靡虫則外是移而裡斯隱孰窺其
贏孰畜其豐盍其反而裕哉厥躬崇崇天如若日
伊煌富以萬生光施八荒仁以覺之敬以握之維
其學之是以獲之迺算迺門則益顏氏于經于理
將不姚姒盈而冲諸伊其寇而冲而盈諸豈其授
而匪授匪寇匪新伊旧人見我新我若而人我其
裕矣我其怙矣怙心驕驕其裕日消瑞乙孫子孔
聖孔神而好是問可自用云齋房靚如夙圖宵書
弗性其性有如百聖

允齋銘

鄧晉卿以允名齋而謁銘於予則銘之曰孰蹟吾
門自門徂齋有金而魚無醎而壘賓忘餒而主亦
樂哉曰樂斯何僕夫其咄有章者編有廉者澤潤
兩作允交相為益厥益交如其弗悅懌惟聖作則
爰得講習兩儀乃神講則貫兮萬理則夥整弗乱
兮相彼一閱悅言乎利我友萃止則喻於義口之
非艱性之惟艱群舖獨欣易牙則然孰天而言孰
聖弗傳我灰歸止我其末旃

寫菴銘

歐陽伯威名其居曰寫菴徵銘於誠齋野客揚某
乃銘之曰

言歷我居言遠彼廬我寓吾軀載離我梓載旅彼
地我寓吾里曾是里離曾是廬墮而子寓為曰人
斯生控搏漚塵干誰質真漢來秦去能幾寒暑茲
不曰寓矧吾與若寄是垠堦胡蒂胡絡咨爾寓翁
既儒厥身亦古厥風賈而未售侯誕甬味聃周禦
寇可浚匪洙可詠匪霄執聖之樞宅彼回室瞻彼
尼日後天其熄有寓有窮有居無終不在其從乃
定乃宿乃葺乃穀乃匠乃玉弗勳則書其以久淪

子獨忽諸

書室銘

室不厭塵書不厭整牖不厭明几不厭淨君子資
之君子師之四物敢侮非天疇欺我躬匪儿我性
匪牖莫整莫虛心有弗疚

七星研銘

端溪七星研紫巖先生故物也其子敬
夫以遺予則銘而藏諸

金玉其聲追琢其泓端溪之美紫岩之朋維仲敬
父詔我誠叟義積瞻之月中見斗揚氏所客墨氏

所國逃揚逃墨子將奚適

充齋

毛少說作齋房讀書其中名之以充請
銘予銘之曰

人皆玉其廬莫或玉其軀人皆穀其腹莫或穀其
德爾胡弗思爾則不賢孰降之衷孰秉其彝有降
靡竭有秉靡奪有覲靡愆天以人滅睨柯匪柯曾
是遠而操士去士曾弗反而推之而充何埴弗崇
充之而實何穡弗銜續之幽幽織之油油言製其
秋其衣其裘萬室煥只爾弗鞠只爾弗勗只東方

旭只

務本齋銘

永新左揆字正卿嗜學進進命其齋以務本良齋
先生記之矣後請銘於誠齋揚万里則銘之曰
峻穡乎獲梓穡乎斲繫士所穡何穡非學學將奚
先何學非賢自賢而聖自聖而天澹則有岸剛則
有畔天入之道畔岸河漢河漢可涯道可方思其
端惟四乃六其藝既三其綱亦五其常闢之彌幽
跋之彌悠據其一原萬善來求人有怙恃誰無孟
季執柯伐柯乃睨而視二典兩帝參天兩地曷濟

登茲不曰孝悌有若肖尼參乎攸嗤本之道生是
以似之瑟彼學子遐不務此聖其遠而子其反而

存齋銘

吳丞名必大字伯豐

永興吳君其丞吉水名齋房曰存謁予銘之銘曰
天棄天精孔神孔明肇域彼中高宅是環庭我有
神舍弗擲于夜寇入在宇我出在野在宇一斯其
從千之在野懷歸室是遠而將聖有續予為孟孫
之族導汝歸宿寇則逐逐匪予汝歸汝弗去兮匪
彼汝寇汝弗居兮汝室戴寧汝扶載宏宗廟百官
疇不汝或承尼日堯墻有覲斯煌有陟斯昂則莫

我敢當道腴義梁詩冠禮裳有操無土疇莫知其
鄉
緩齋銘
吾友吉之戶曹掾趙君公括少監提刑老先生之
次子也賢而文儒而能官位職之初名其公之齋
房曰緩謁予銘之銘曰急為緩師匪弦匪規緩為
急資資在在韋有鳴者雞二人同琴一阮一媯塗
是遠而君子所履疇彼疇此韋弦由已不可則止
萬趾徐徐繫善之通舍韋而趨如鏑赴堯萬指汲
汲繫利之捨舍弦而戢如燬違溼宜赴而違曷媯

之歸宜違而赴曷跖之去跖聖之藩求魴于山求
鮑于淵於萬斯年之子耆學家有老斲過庭有覺
其避席而作

敬齋銘

新喻蕭一致字伯易三堂居士從義孫
也山谷為作三堂銘云伯易作敬齋禮
曰毋不敬程子曰主一曰敬銘曰

維事維萬維心維一聽弁思鴻維貳維忽貳豈其
忱忽豈其欽維動維言其弗喪心三堂孫子學以
為已欲已欲趾聖門主一為址謹獨慄然履臨水

洲及轆厥成對越昊天

省菴銘

西昌梁大用字器之篤志嗜學進未慙也命其讀書之室曰省菴來乞銘銘曰人無鑑銅當鑑以身人無鑑身當鑑以心一善之萌鬼神知之非鬼神之知吾心已知一不善之作海漚亦覺非海漚之覺吾心已忤知之斯行吾心吾朋忤之斯絕吾心吾鉞孰鉞孰朋省則勇而朋士鉞喪昧則縱而以省攻昧維聖作對以昧擊省擿埴觀井參省以日吾省以時參省以三吾省千

之維聖無過維賢寡過欲寡未能吾其敢惰

西塾銘

禾川竊行之作西塾以訓迪厥子請銘於誠齋老人銘之曰

衛俞之族有西其塾維學之麓維子之淑咨爾子孫于弟于昆洗心雪神明聽話言我築我廬爾群爾居有易春秋有詩有書琴在在牖書在在手爾誦爾弦以復爾有爾有伊何伊孝伊忠伊義伊仁于玉爾躬雞既鳴矣爾夙爾起日之夕矣爾膏爾燬具躰維洲聽視動言維禮為塗雄趨聖門命世

維益盡心知性俯跼百氏仰承三聖匪孟匪顏于
跋于攀瞻彼數仞覺而登天潛而未徹如攻堅木
徹而莫禦如泉赴谷由心而身由身而親由親而
君氣志如神咨爾孫子爾聆爾思非道弘人室是
遠而

贊

文潞公畫像贊

竺景東畫文潞公像陳勉之携來未贊某贊曰俾
宋作古自我 仁祖心一德同潞國文公不兵不
革正是顏色式是中國震是戎狄有頌者冠忽然

在前喜有人焉焉知九原

醉筆戲作生菜贊

粹乎蔬則已瘠粹乎肉則已腴腴而不腴蔬芘肉
也瘠而不瘠肉膏蔬也孰使予最雲子之諫拓歡
伯之騫者不在茲乎不在茲乎

菜贊

其菜可溫其蕢可發其榦可薪其藥可根有禪乎
身墨氏之仁

玉石贊

山有玉工則琬之溪有石家則礪之士有韞人則

語之吁

張定叟畫像贊

溯之西東轉饒而豐其誰之庸朱張兩公神臯天
咫吐衿其理後先趾美維張與李孰知夫傾東海
於談餘振華嶽於物初顧是區區是殆見吾善者
機歟長松白石清泉激激杖屨野服於一丘一岳
之間予安得從定叟於南山之南北山之北

自贊

吾友王才臣命秀才劉訥寫余真戲自

贊曰

汝翎弗長汝趾弗強毋馱汝頑毋競汝驥于崖于
濱其窈其茫曠曠其光戈誰汝傷秋作月荒春作
華音荒哦者遜厄醜者遜狂汝老是鄉莫與汝爭
銜

張伯子尚書畫像贊

江西連帥華學尚書篤素居士張公伯
子之畫像大兒長孺圖之以示予一別
十年千里再見敬贊之曰

戾戾契契逢怖則折嘻嘻休休覲誘而流有偉張
公洵素且冲匪石厥衷迺玉厥躬勁于疾風柱于

河洪淑兮吾怙慝不吾惡弗撼弗助弗誘弗師曲
江之持于湖之摘孟氏之素其不在茲

張欽夫畫像贊

唐德明示士交南軒先生畫像敬為之
贊

名世之學王佐之才一瞻一慟非為公哀

寫真贊

吉州通守趙德輝命史寫老醜戲題之
曰

有俗者巾有藜者杖雲嶠風杉步月獨往龍伯國

之民歟無邛鄉之民歟

王時可命敏叔寫予真題其上

髻巾鶴裾山澤之矚汝荷簣之徒歟抑接輿之徒
歟

張功父畫像贊

功父久別喜得解后寒溫之外勞苦之
曰

香火齋被伊蒲文物一何佛也襟帶詩書步武瓊
瑤又何儒也門有珠履坐有桃李一何佳公子也
冰茹雪食瑀碎月魄又何窮詩客也約齋子方內

歟方外歟風流歟窮愁歟老夫不知君其問諸白
鷗

張功父命水鑑寫誠齋未贊

索汝乎北山之北汝在南山之南索汝乎南山之
南汝在北山之北丁寧溪風約束杉月有問汝者
千萬勿說誰遣汝多言而滑稽又遭約齋之牽率

樂府

誠齋歸去來兮引

儂家貧甚訥長飢幻穉滿庭闈玫坐餅無儲粟漫
求為吏東西

偶然彭澤近鄰坊公林滑流起葛巾勸我求為酒
黃菊怨冷落東籬五斗折腰誰能許事歸去去來
兮

老圃半榛茨山田欲蒺藜念心為形役又奚悲獨
惆悵前迷不諫後方追覺今來是了覺昨來非
扁舟輕颺破朝霏風細慢吹衣試問征夫前路晨
光小恨喜微

乃瞻衡宇載奔馳迎候滿荆扉已荒三徑存松菊
喜諸幻入室相携有酒盈尊引觴自酌庭樹遣顏
怡

容膝易安栖南窗寄傲睨更小園日涉趣尤奇儘
雖設柴門長是閉斜暉縱遐觀矯首短策扶持
浮雲出岫豈心田鳥倦亦歸飛翳翳流光將入孤
松撫處淒其

息交絕友塹山溪世與我相違駕言復出何求者
曠千載今欲從誰親戚笑談琴書觴詠莫遣俗人
知田田谷解后又春熙農人欲載菑告西疇有事要耘耔容
老子舟車取意任委蛇歷崎嶇窈窕丘岳隨宜
欣欣花木向榮滋泉水始流澌萬物得時如許此

生休矣吾衰

寓形宇內幾何時豈問去留為委心任運無多慮
顧遑遑將欲何之大化中間乘流歸盡喜懼莫隨
伊

富貴本危機雲鄉不可期趁良辰孤往恣遨嬉獨
臨水登山舒嘯更哦詩除樂天知命了復奚疑

上章乞休致戲作念奴嬌詞以自賀

老夫歸去有三徑足可長拖衫袖一道官銜清徹
骨別有監臨主守主守清風監臨明月兼管栽花
柳登山臨水作音詩三首兩首

休說白日昇天莫誇金印斗大懸雙肘且說廬陵
新盛事三箇閑人眉壽棟罷軍負歸農押錄致政
誠齋叟只愁醉殺螺江門外私酒

七月十三日夜登萬花川谷望月作好事

近

月未到誠齋先生到萬花川谷不是誠齋無月隔
一林脩竹如今終是十三夜月色已如玉未是秋
光奇絕看十五十六

昭君怨賦松上鷗

晚飲誠齋忽有一鷗來泊松上已而俄

去感而賦之

偶聽松稍撲鹿知是沙鷗來宿稚子莫誼講恐驚
他俄頃忽然飛去飛去不知何處我已乞歸休報
沙鷗

昭君怨詠荷上雨

午夢扁舟花底香滿西湖煙水急雨打蓬聲夢初
驚却是池荷跳雨散了真珠還聚聚作水銀窩瀉
清波

武陵春

老夫茗飲小過遂得氣疾終夕越吟而

長孺子有書至，答以武陵春。因呈子西，
長鉄歸乎，踰十暑不著。鷄鷄冠道是今年勝，去年
特地減清驩。舊賜龍團新作崇，頻啜得中寒。瘦骨
如柴痛，又酸兒信問平安。

水調歌頭賀廣東漕蔡定夫母生

玉樹映階秀，玉節逐年新。年年九月好，為阿母作
生辰。澗底蒲芽九節，海底銀濤萬頃，釀作一盃春。
泛以東籬菊，壽以漆園椿。對西風，吹鬢雪，炷香雲。
卽君入奏，又迎珠幃入脩門。看卽金花紫告，併舉
莆常兩國冊，命太夫人三點台星。上一點老人星。

四月二十八日同履常子上晚酌戲集句
作四月之詩五章章四句

四月嘗春酒及時魚也。四月維筴，颯風自南。綠竹
猗猗，維石巖巖。我有嘉賓，賁然來思。為此春酒，酌
言獻之。南有嘉魚，維其時矣。維筍及蒲，維其嘉矣。
園有桃李，左右采之。標有梅薄，言掇之。今夕月出皎
兮，東方未明，不醉無歸。

嘉定元年春三月男
長孺 編定
端平元年夏五月門人羅
茂良 校正

誠齋集卷第九十七終

誠齋集卷第九十八

廬陵楊

万里

廷秀

雜著

題跋

跋 御書誠齋二大字

淳熙十三年三月十九日 今上皇帝陛下於東
宮榮觀堂召宮僚燕集酒半從至玉淵堂詹事臣
卿臣端禮諭德臣揆侍講臣袤各傳刻所賜御書
齊名籤軸以進再拜稱謝惟侍讀臣萬里於同列
為末至蓋已嘗有請因再拜申言之

皇帝陛下欣然索一大研命磨潘衡墨染屠覺竹
絲筆乘興一揮誠齋二大字贈侍讀楊揆詳六小
字識以清賞堂印視諸齋字畫雅健相若而精神
飛動似覺更勝恭惟 皇帝陛下心畫起詣雲章
昭回龍跳虎卧鸞飄鳳泊蓋天縱之能聖覺之餘
也臣既拜賜退而寶藏於家今假守高安郡幸逢
六龍御天之初敬刻之金石以後寒士千載之榮
遇云淳熙十六年歲次己酉八月戊子朝議大夫
直秘閣知筠州兼管內勸農營田使備紫臣楊万里
拜手稽首謹書

跋八御書御製梅雪詩

今上皇帝陛下在東宮策觀堂宴群僚月既為臣
万里親灑宸翰作誠齋二字後書御製嘗梅詩一
首五紙將以分賜臣邛臣端禮臣揆臣万里臣袤
置之儿上莫敢先取者臣万里即請云敢用劉洎
登牀故事乃急取此紙蓋肆最得意者

皇帝天顏為之載穆群僚皆有歆羨之色是歲冬
皇帝一月復命春坊臣特立傳賜群僚以御製梅
雪詩三首凡五紙恭惟 皇帝陛下道德之崇極
典學之緝熙固已登咸二典三謨之業聖之渾噩

詩句之高古又復憂擊商頌周雅之音祀大風之
歌秋風之辭皆莊周所謂風斯在下者臣敬刻之
高安郡治俾士民誦之詠之興雅頌異時同聲焉
淳熙十六年歲次己酉八月戊子朝議大夫直祕
閣知筠州軍州事兼管內勸農營田使備紫臣楊
万里拜手稽首敬書

跋張欽夫介軒銘

欽夫之文清於氣而味永吾見之多矣而猶恨其
少讀此銘詩欣然殊慰人也君子之於水木竹石
愛之與衆人豈異也衆人之愛水木竹石也愛水

木竹石而已矣欽夫愛唐氏之石而得乎介又以
其得而施及於唐氏則其愛也水木竹石而已乎
有來觀者其愛與欽夫同不同未可知也一笑而
書其後所以一笑者予欲書而忘其書也紹興壬
午廬陵楊万里跋

跋熊叔雅所作唐傑孝子贊

孝慈者多連理同蒂之應世以為祥非也當是孝
慈所化草木亦孝慈耳觀孝子唐傑之事豈不然
哉嗟乎草木非有知也人非無知也或化焉或否
焉又何歟隆興初元四月十二日廬陵楊 跋

過揚塘趙清猷神道題柱衢州地

是惟清猷之墓過者可不敬乎敬斯慕慕斯為二
之前則曰能一之後則曰不能敬猶不敬也吾徒
楸之

跋歐陽伯威句選

右歐陽伯威詩句之擇也予既序其勝辭復手抄
此數紙自有用處每烏啼花落欣然有會於予心
遣小奴挈屢樽酤白酒醺一梨花瓷琖急取此軸
快讀一過以燕之蕭然不知此在塵埃間也而伯
威喜予書又奪去此紙誰復伴幽獨者年月日跋

題曾無逸百帆圖

千山去未已一江追之予觀百餘舟出沒於風濤
縹縹雲煙有無之間前者不徐後者不居何其勞
也而一二漁舟往來其間獨悠然若無見者彼何
人耶

跋章友直草蟲

春寒介許新蟬飛蠅輩遽出耶細觀蓋章伯益墨
戲也庚寅三月上巳日揚跋

跋曾無遠所藏米元章帖

米家字畫遭逢紹興聖人謂字字飯復古殿中矣

而此紙尚遺人間士之遭時求其必不遺難哉

跋曾正臣兩踈圖

予每讀唐人文字喜言兩踈畫圖惜不得見今真在眼中矣然以孝宣清明之代而二先生何去之早耶及觀蓋寬饒傳則知都門祖帳之縵二先生父子相顧飲之彼猶以為晚介

跋劉景明四美堂序

吾友劉景明此作非四美堂序也蓋禾川晚秋圖也乾道六年九月望誠齋野客楊万里跋

跋陳與權印五經善本

以書刻印者未有不利焉者有不利焉者惟異端之書為然刻異端之書者則然所以刻者則不然朝刻其書以貽諸人夕計其福以貽諸身烏在其不利焉者歟南雄陳經於光堯朝以童子科免秋賦詣太常未得志於有司退而歎曰有司之門則不可以迂而入也聖人之門其不可以迂而入哉益讀古書以澆其心以樹其躬以擘其辭章蓋退而後進者也病夫書肆之刻五經者字畫之不精脫訛之不更求善書者為而刻之使來者皆得以印印之嗟乎利之不斲福之不計異端之不溺

士之若陳子者稀矣五經之彰繫於刻不刻耶不
繫於刻不刻也於斯三者吾獨以嘉陳子年月日
某謹書

跋陸宣公集古方

陸宣公之貶也杜門集古方書而已或曰避謗者
歟或曰窮而不怨也揚子曰宣公之心利天下而
已矣其用也則醫之以奏議其不用也則醫之以
方書有用有不用者宣公之身也宣公之心亦有
用有不用乎哉

題曾無已漁浦晚飯圖

浦吾里舳舻吾宅黃帽卽吾侶也苒苒京塵于今
三年偶開曾無已此軸風煙慘澹波濤洶欵欣然
振衣登舟云乾道癸巳月日書

跋歐陽文忠公秋聲賦及試筆帖

六一先生墨妙每見石刻未見真蹟也今乃得見
秋聲賦試筆帖先生之孫提幹不來飯故鄉安得
此奇觀提幹云尚有集古錄跋及家書四百餘紙
某聞之雖喜然未敢書盡求觀也某山林之日月
永欲一日盡此四百紙何以卒歲

跋李成山水

余葺茅棟而工徒病雨擾擾不肯畢也今日偶小齋烏烏之聲樂吾友王才臣偶携李成山水一軸來展卷煙雨勃興庭戶晦冥吾廬何日可了耶

跋趙大年小景

予故人曾禹任寄似大年小景敗素一規不盈尺也愈視愈遠忽去人萬里之外然水石草樹鴻雁鳧鷖可辨秋毫予刺欲放目洞視之而舊以挑燈抄書目青屢作嘗謁之醫醫云窮睇遠睨目家所忌也偶憶此戒速卷還客

跋蘭亭帖

右蘭亭記曾禹任得之諫大夫毛氏毛氏得之淮陰非近時襲訛者也予見元明跋山谷書云山谷謫黔沅峽舟中日月惟把玩石刻一紙蓋此記也故末歲筆法超絕云予聞五更侵早起更有夜行人願持此句子寄聲山谷

跋涪溪曉月錢塘晚潮一軸

予以歲癸未官滿涪溪去年自杭都補外每懷兩地山水之勝輒作惡數日所謂東西南北皆欲往千江隔兮萬山阻者歟今日獨坐釣雪舟中風雪方霽故人曾禹任邀我乃併至兩地此殆夢中事

也

跋劉彥純送曾克俊作室序

曾克俊之居距吾家三里而迫予每步訪之周以脩竹面以東山甚愛其幽勝然目留而心不隨忽喜而倏懼徃徃不及坐而去者蓋克俊之幽境能悅人未若克俊之破屋能逐人也西溪先生所謂將廢者特聞而知之焉尔今則又甚矣西漢所謂左撐者前日晨炊不熟取以煬竈而疇昔之夜雪作地爐無火復取所謂右支者薪之矣適有天幸入冬不風後此數月春風勃興此屋亦殆矣哉因

克俊携西溪序篇來附書左方以告仁人君子之憐克俊者

跋張安國帖

張安國書甚真而放如此然學之者皆未嘗見公之足於戶下者也

跋許將狀元與蔣穎叔樞密帖

前輩與執政書亦猶字之今人年未三十一舉於禮部則卿先生不敢字之且稱曰張丈李文矣嗚呼其益薄矣夫

跋半山老人帖

半山老人此帖蓋與劉丞相之子元忠侍制也紙尾云外物之來寬以處之此老心法也佩玉廟堂而面帶騎驢荒陂之色觀其字見其人

跋曾子宣帖

曲阜筆迹斷爛可惜擣粉為牋其新也豈不滑澤可愛其久乃余問交亦然

嘉定元年春三月男

長孺

編定

端平元年夏五月門人羅

茂良

校正

誠齋集卷第九十八終

誠齋集卷第九十九

廬陵楊

万里

廷秀

雜著

題跋

跋郭功父帖

俗吏之冗不得觀書功父所厭此殆子同病也

跋薛諫議曾都官帖

薛諫議曾都官與親戚少者書前署名而後花押使施之今之後生怒罵不置矣

跋山谷小楷書陸機文賦帖

予嘗見前輩言山谷先生為人書古人詩文初非
揆書亦非已出必問求書者曰子欲某史某傳乎
某賦某詩乎文選諸賦自三都二京子廋西征江
海之外文賦辭最多而先生一筆為晁仲詢芻民
書之雖未卒章亦不少矣今之士引筆未識偏旁
姑無以譙為也能不檢書而寫古人詩書字六七
十如五六十者有幾顧曰筆畫記誦學之末乎介
以此帖示之得覆督說其榮厚矣年月日某跋

跋王才臣史論

此吾友王子俊才臣年十七時所作歷代史論十

篇也是時老氣橫九州毫髮無遺恨誰謂只今猶
在餘子後耶今尚書承旨周公每歎科舉之刀尺
精於擇士而粗於擇有司魚網之設鯁則麗之其
意端為王子發也吾又奚言

跋曾達臣所作蚺蜴螳螂墨戲

飯愚居士曾達臣子家親戚且最厚者子知其蓄
學問善議論今古而已其子無逸為子出二蟲敗
紙而有生熊子既驚喜其奇觀又歎平生初不知
達臣之多能也所扶愈大者其知愈狹子之不知
達臣獨此而已乎之二蟲又何知溥熙己亥季冬

十七日誠齋野客揚某書

跋尚帳幹所藏王初寮帖

覽王初寮帖卷首愛其字畫美秀然其神氣風骨
竟莫名其胄出也最後次韻尚仲明衡陽十絕句
如獻臺鴈峰等字乃知其為東坡之別子豈其出
之於建炎之後而闕之於宣政之間耶蘧篔之下
誰知庚水政在此也

跋東坡所書雉帶箭大字帖

東坡先生所挾孰非招尤取嫉之具僕出此掀天
決地大字投畀嶺海豈元符大臣罪哉

跋米元章登峴大字帖

某學書最晚雖遍參諸方然袖中一瓣香五十年
未拈出也今得見米禮部登峴大字乃知李密未
見秦王耳

跋尚仲明文藁

知已在言路此巧宦者進軟語待彈冠之秋也尚
仲明抵之以書規其患失而詭其盡言拙矣哉

跋謝昌國所作何孝子傳

昔柳子書段太尉事以論史官今謝子書何孝子
事以論予予野人也何孝子於是為不遇矣年月

日楊某跋

跋韶州李侔所藏山谷書劉夢得王謝堂

前燕詩帖

此山谷飯自黔南之官當塗時所作也雖放舟大江順流千里而兩川雲煙三峽怒濤尚勃鬱洶湧於筆下

跋蕪黃滑稽錄

此東坡山谷禮闈中試筆滑稽也蓋莊周惠子不幸再相遭者或問二先生語何經見子曰坡谷聞之憑虛公子憑虛公子聞之亡是公亡是公聞之

非有先生

跋東坡小楷心經

予每見山谷自言學書於東坡初亦無然恐是下惠之魯男子也今觀心經乃知波瀾莫二昔宋人請南宮長萬於陳陳人飲之酒醉而以犀革裹之比及宋手足皆見

跋劉原父制詞草

歐陽脩 宋祁 范鎮 王疇 宋敏求

制古之為政者法後王為其與已近於其制度文物之可觀也

故宋也

唐有天下且三百年其聖

君賢臣忠相與經榮扶持之

功美政善令謀固

已史其行事多矣而記述失序

至於使臣興壞

成敗之迹晦而不章朕甚恨

故擇廷官使筆削

家之具官某統紀裁成大躰具官某具

具官某

遺官其創列

厥恟異同九十有一年大典乃

富

精覈立皆離

精覈立皆離

誠齋集卷第一百

廬陵揚

万里

廷秀

雜著

題跋

跋廖仲謙所藏山谷先生為石周卿書大

戴禮跋作篇大公冊書

文字中喜用古人語此自是山谷一法也如先生
羨米後生為稅以貧賤有人易以富貴有人難之
類此呂覽語也豈盡然哉而今集中至全載冊書
諸銘與山谷之文相亂蓋山谷嗜此銘故每喜為

人士書之耳此軸其一也莊周之蝶不可以告周
子之兄信有是事淳熙丁未六月十九日

跋謝安國詠史詩三百篇

遷固紀傳一篇百千言而安國約之於二十字杜
少陵所謂咫尺應須論萬里者與誠齋楊某淳熙
丁未八月二十日書

跋段季承所藏三先生墨跡

六一先生半山老人東坡居士間何闊也因段季
承為介紹乃一日併得望履懷下快哉淳熙丁未
至後三日廬陵楊某敬書

跋豐城府君劉滋十詠

豐城府君愛山成癖不知身之化為山歟山之化
為身歟讀山中十詠覺嵐翠染衣崖凍襲骨淳熙
丁未十二月七日誠齋野客楊某跋

跋蕭武寧告詞

某聞吾鄉蕭氏滅去其祖武寧府君仕於吳特告
命而未之見今日延卿姑夫携訪相示墨色如新
不知其為異代二百餘年以前物也自武寧至延
卿於是九世矣微祖孫仕學相承能如是傳之之
永乎余知蕭氏之未央也豈惟未央其必有興者

慶元戊午四月十一日誠齋野客楊某敬書

跋蕭侍御廷試真書

侍御蕭公廷試文卷一月三題文不加點固難能也而其詞深厚淳質不矜浮文如大羹元酒渾金璞玉可以見 祖宗時人才之邃雅矣慶元戊午四月十一日誠齋野客楊某書

跋趙士隆江州死節墓碑

趙端國初相誠於金陵詞粹而氣淑以為其人俊俊儒者也別去七年矣昔歲之春來為吾州上幕與之把酒道舊故為笑樂外莫知其挾未幾則聞

潔廉自將正學以言守法以立每議一政一事山可移不可奪蓋天下之士乃未易知如此哉今日王才臣來訪袖出端國之曾大父總戎公墓碣與前輩諸公問題傳後語讀未竟舍卷起立髮上衝冠鬚髯畢張且憤且悼而繼以泣曰嗟乎忠義信有種乎曾無君子者斯焉取斯而太史公乃曰天之報施善人非邪昔魏文帝以世無大浣布信有是事年月日誠齋野客楊某敬書

跋蔡忠惠公帖

世傳仙人呂公飲酒家大醉自寫真壁間而去明

月觀者如堵牆或以問予曰傳者誕也或曰寫者亦誕也予不能決友人蔡定夫寄贈其祖忠惠公帖讀至思杜祁公遇孫資政詩情殿中君謫春州事簡牘因悟曰呂公事非誕矣或曰何用知之曰忠惠斯言非為三君子設也然則誰為曰是亦忠惠自寫真也或曰子之言亦誕也予滋不能決併書于附以決諸定夫

跋李氏所藏黃太史張右史帖

右山谷帖二十七紙張右史帖十一紙予友人李師心携以示予蓋自其從曾祖承議公與二先生

還徃之尺牘滅去至師心今四世且百有餘歲矣其紙新其墨濕猶昨日物也滅之久而莫之竊觀者衆而莫之奪其守寶有道哉予於是有感焉豈惟此帖哉又有大者焉使李衛公子孫能守其花木竹石魏鄭公子孫能守其宅與笏房杜子孫能守其門戶皆如李氏子孫之守此帖至今存不存也予於是重有感焉豈惟數姓之所有哉又有大者焉年月日誠齋野客楊某敬書

跋趙主管乃祖忠節錄

二叔叛周七國反漢而我宋建炎之難永豐有誨

道直閣齊安有令歲長沙有聿之三公皆以屬籍
死節節貫三光名塞兩儀霜松雪竹生我靈囿世
謂今人不如古其然乎哉其然乎哉直閣之孫彥
權示予以忠節錄敬書其後

跋李伯珍詩卷

伯珍取別一星矣今日安成劉伯彊送似渠癸丑
詩一卷清新俊逸奄有二子成三人矣今想更進
觀伯珍之進自笑予詩之退也

跋張永州尺牘

右同郡齊年同舉張公叔保之尺牘也是時予棄

官山居而叔保為豫章別駕與予此書卑詞索爾
殆過乎恭此禮應上官乎施不應朋友乎施者予
再拜辭而取之其子履乃能藏去此紙把翫手澤
如新覽之淩落林謙之劉賓之每云叔保佳士恨
不盡見其文然牋記中亦可見其一斑此牋又一
斑者嘉泰元祀六月庚寅誠齋野客揚某跋

跋張伯子所藏兄安國五帖

于湖張公下筆言語妙天下當其得意詩酒淋漓
醉墨縱橫思颯月外與逸天半東坡云李太白死
世無此樂三百年矣其初挂名於公之榜又嘗再

見公於直廬今其季伯子尚書寄示五帖開卷未
了山立玉色凜然在人目中也或曰昔東坡雄雉
而服子由之近道今于湖邁往而愛伯子之端愿
何也其曰東京人士有問二荀於許章者曰靖興
奕執賢章曰二人皆玉也慈明外郎叔慈內潤嘉
泰元祀六月戊戌誠齋野客楊某敬書

跋彭道原詩

吾族與蕭氏世姻也而未間有所謂躬節堂者因
觀彭道原此詩問堂無恙則化為荒煙野草久矣
曾不百年而物之廢興如此是可歎也至於昭甫

之名節則千載廉然也堂何與焉嘉泰元祀六月
庚子誠齋野客楊某書

跋羅天文墨蹟

右此帖予婦翁印山先生羅公天文送士人曾千
里序也予往來印山求公之文章字畫而不得今
其孫紹何許得此紙再拜三讀悲嘉相兼環詞妙
墨兼麗山谷此羅氏密湏之彭封父之繁弱也君
家子子孫孫永言寶之自紹興辛酉三朝至今歲
嘉泰辛酉良月初吉蓋甲子一周矣此帖六十年
乃出而歟羅氏物之顯晦故自有時耶况於人手

誠齋野客揚万里敬書

跋袁機仲侍郎易贊

右易贊并序吾友子表子機仲侍郎作也微斯人眸子不運而見三聖一心空洞以納大極能倒傾蛟室寫此瓊瑰否誠齋野客揚万里敬書

跋喻子才為汪養源書李元中鞠城銘

李銘汪碑喻題若著同時汪規異時遺珪一日三師累其庶幾

跋王灑溪民瞻先生帖

灑溪先生以詩取老檜之噴二沈希其意出力擠

先生以策元勲竟何成耶先生料其不三年必有大咎果若其言又四年檜亦殪古語云前車覆後車戒泰壬戌後五月門人揚万里敬書帖尾而飯之其宅相彭夢惻云

跋林黃中書忠簡胡公遺事

林侍郎黃中一字寬夫其所書澹菴先生遺事當万里作行狀時所未聞者豈特其所未聞其子孫亦所未聞也是時王之望乎穡得志其威能陷張魏公而不能不折於先生之一詰其辯能聳虜勢以脅其上而不能不沮於先生之一吞茲不謂大

丈夫乎

跋忠簡胡公先生諫草

澹菴先生之孫槻寄示先生諫草凡十一行卒章云臣不恐見虜寇入門等語其痛次骨万里讀至此不覺涕泗之沱若也蓋當是時和戰之難之時也國是數定而婁搖國勢將怯而後壯仲尼曰民到于今受其賜

跋張魏公答忠簡胡公書十二紙

此帖十二紙皆紫巖先生魏國忠獻張公答澹菴先生忠簡胡公手書也紹興季年紫巖謫居於永

澹菴謫居於衡二先生皆年六十矣此書遷徙無一語不相勉以天人之學無一念不相憂以國家之慮也萬里時丞零陵一月併得二師今大馬之齒七十有六夙夜大懼此身將為小人之飯後見此帖再拜三讀二先生忽焉洋洋乎如其上如在其左右

跋山谷踐阼篇法帖

予頃丞零陵嘗於同官張仲良許觀山谷先生小楷兩都賦歎其多而不疲且愈精也仲良笑曰此未足歎也予知其落筆時手學者每求作字山谷

必問曰欲六經何篇左氏傳太史公班孟賢書何篇宅詩文亦然即隨所欲一筆立就命取架上書閱而校之不錯一字蓋張仲丞口誦山谷筆誦也西昌彭孝求好古博雅示予踐阼篇因志所聞於後予嘗見章懷太子注范蔚宗後漢書載武王衣銘云蠶事苦女工難得新棄故後必寒而此篇無之豈逸文乎抑見他書也則併志之年月日某書

跋李彥良瑞木

董生孝慈瑞見大雞韓子詩之謂刺史不能薦天子不聞名歎其不上聞所以媿其不能薦者也彥

良平國之孝友幽能致瑞於天而朋不能上聞於朝當有蒙其媿者今彥良之孫彥從能傳大父之學用心如止水卹族如葛藟瑞木其再榮李氏其有聞與嘉泰甲子孟陬晦誠齋老人楊万里書

嘉定元年春三月男

長孺 編定

端平元年夏五月門人羅

茂良 校正

誠齋集卷第一百終

[Faint bleed-through text from the reverse side of the page]

誠齋集卷第一百一

雜著

廬陵揚

万里

廷秀

祭文

祭張魏公文

具官揚某謹以清酌之奠西望慟哭百拜致祭于
近故大丞相少傅魏國張公先生之靈嗟呼殄瘁
之悲天人不同至極者孔明與公敵人骨驚中
原欲平厦屋垂成而折其甍孰喪孔明非天而天
孰喪我公天而非天胡為乎天天厭漢也胡為非

天天 宋睠也 宋睠則那而奪其老天不其奪
天不其保叔破且斧叔毀孔目天而能保則握其
舌公未再相國人曰賢公既再去左右乃驩謂公
賢矣莫留其叔公不賢矣國人我欺招以萬口麾
以一手一不勝萬其然其否彼退則憂公進則憂
憂同而殊家國之謀正叔之學公則心之君實之
德公則身之因心以身因身以君正君以 祖
太 太 真 仁相于兩朝暮年暮月日洗天澄
淮安江謐暮月乃余胡不百年公而百年公無地
安公今安矣民則艱矣呼公不聞民則潛矣踴踴

小子受知惟深道學之傳可護于心報公則無兩
以清血俎以名詛料以誠實羸然倚廬莫望喪車
千里一觴公其吐諸

祭羅季呂文

惟靈凝而不穢藻而不蒨有鬱斯幹而不千尺不
惟天倫滴淚到泉几我昏友誰其不潛子之尊公
非異人望心子目子搏扶而上心久益堅目久而
穿豈子願然則懸乎天天司下人培淑賈慝子慝
則無而至此極春如其容淵如其中蔚如其詞竟
不其逢吾文則蕪聊復子尉子知不知吾涕則費

祭劉公佐致政奉議文

疇肯之秋我往拜公公老不扶鬢顏白紅秋又聿
至則聞公病我首斯經莫或遑省云何不淑遽至
於斯以哀弔哀有國無之我不知公知公者天弟
仕兄及德高於年子賢而文我友之冕義均孔懷
豈待姻婣申以姻婣兩翁私憂曰予兩家百世相
繆其憂則私其意不私交不金石義斯磷緇公今
千載言復奚益一觴觴公有淚沾臆

祭趙子顯直閣文

具位揚某謹東望慟哭百拜謹以清酌之奠致祭

某官之靈歲在辛巳虜酋跳邊謂吾大江可投以
鞭諸將千屯雲崩濤退天子自將與虜作對大江
之濱有金其城岌然孤堅虜不敢櫻匪城斯畏伊
人斯忌其人為誰趙公刺史城以公崇江以公深
餉以公豐虜以公擒公忠而勞民感以奮南國既
寧公功誰問臺閣造天不以公登灑瀕如象乃以
公行蜀天遼遼公以喪返摧國之楨萬心一怨嗟
我孤窮恩深惟公赴告來思悲填于胸職思其守
莫哭于柩挹醴注茲詞以為侑

祭九叔知懸文

嗚呼惟我與公豈如他人族則小疎情則至親名
則二人實則一身自幼至壯于學于仕我有公隨
公無我棄公唱我和疇同疇異我少也賤無廬于
鄉流離之悲我豈無腸公曰子敏子生我里他邦
之人何得留子卜鄰接屋此心疇知竹林之遊老
以為期別公三年此豈曰久如何公敏乃在于柩
我忽無公如屢失梁如駕失翰如涉失航天乎痛
哉焉用呼天曰天與善公胡為然厥操栢竹厥德
龜王厥詩厥文凡今之獨天不祐曷付之茲既曰
付之曷不祐之西垣南臺皆公知己薦口方開公

則已矣我以官拘會哭則那寓辭一哀公乎奈何
尚饗

祭虞丞相文

具位某謹以清酌之奠西望再拜致祭于近故宣
撫少保左丞相先生之靈嗚呼曠彼元顏猗于淮
壖氣無長江不曰投鞭錡也既退權也亦潰孰宣
王靈武過狂悖公以書生雍容請行澹乎無營安
乎無驚矢而石而公則身之有殞我躬無復我師
三軍一人萬人一心彼自送死無勞我擒長蛇噬
矣公其殄矣有昊地矣公其起矣宗祏殆公其妥

詞苑集卷二
矣黔黎泯矣公其拯矣其後十年乃相吾君進退
速邊蓋詢國人曰公來四方庶平公曰吾敏西
鄙匪輕俾民知兵俾兵知耕雜渭之濱前無孔明
大功垂成大星夜隨我師相泣彼虜交賀公宅于
揆人或公咎今皆公思公豈復有維彼之人於公
曷畏曷存而忌曷亡而喜維此之人於公曷疑曷
生而讖曷沒而思在昔聖賢疇免乎是苟無天日
我心則媿維公平生憂國如醒齊志下泉目其能
瞑昔公在位如富范韓古風蕭蕭公欲追還率籲
衆俊載飛載集而我何為亦寘百執我思其人玉

立長身凜然目中御風駕雲思之弥近忽然弥遠
西望岷峨有淚如絃嗚呼哀哉尚饗

祭汪氏夫人文

嗚呼近世大家孰振厥華于江之涯維王與汪于
闕有光嶷然相望有齊夫人維汪之孫王氏是嬪
茂族相趨是似是宣孰盛與夷象服沃如壺彝穆
如婦德肅如邦君之來魚軒則偕鵲巢與儕云胡
不淑逝者其速隕霜于菽菲然醴饗不腆不豐小
君之恭

汪氏夫人路祭文

夫人所怙肇自幕府扶日御天再考宋宇遂相光
堯宅是元輔中興疇庸其孰與侶如夏女艾如周
山甫如漢鄧禹如唐尚父盛德所流實潤實溥是
生夫人典則有裕嶺繁中清環珮中矩謂天不祐
德豐厥付謂天不岐齡蓄厥與邦君方昌雲翔風
翥諸卽玉立繼繼多譽偕老之章陟岵之句遂廢
此詩誰謂荼苦江水注只江日暮只靈輶路只歎
此醑只

祭羅元忠文

代內

嗚呼手足之親實維八人三兄五妹相依以生仲

氏夙喪伯氏繼往維我季兄既老益壯嗟我夫婦
宦游東西庚寅之別五年乃叙昨一見兄已有病
顏今升兄堂兄聿蓋棺長松既仆小草何附蒼天
蒼天有此惻楚翩翩者旌迫彼幽宮一觴永訣悲
不可終

祭三十五叔婆蕭氏文

於穆夫夫憲部之孫大夫之婦保昌之嬪延玉厥
德闈中維則贊贊保昌俾躬厥職保昌倦飛棄官
言叙二老其皤松雪相輝教子弄孫芝秀蘭茁慶
流如川有溢無竭保昌既逝夫人獨存如彼靈光

嶽然益尊云胡不淑讓卓斯粹美擯斯殫象服斯
闕嗟我先妣幼失外家鞠于夫人德豈有涯我見
夫人如妣存焉飯而不見淚如迸泉尚饗

祭劉雪都先生夫人彭氏文

疇昔零陵師生同僚日親範模日聆英韶既而兩
家復締姻好先人康強先生未老繫我老母相從
夫人尊酒徵逐兩家如春歲在甲申我失所怙曠
曠無依視師猶父先生繼徃夫人白首兩家北堂
二老眉壽如何不淑夫人隕傾赴告鼎來令人怛
驚懿懿夫人淑問有耀班姑之文孟母之教毘我

先生丕崇厥門命服有華丕顯厥身既貴且老耄夫
復奚憾家失賢母子孫之惜我將使指詔過其行
弔之不得有慟失聲尚饗

祭張欽夫文

具位某謹以清酌之奠致祭于近故欽夫安撫左
司之靈嗚呼孰航斯世不挾斯器舍失即雉孰玉
厥躬不瑩厥蒙宵征不烽古我潛聖天寶鐸之冽
彼洲泉飲者酌之學外曰政人外曰天茲不日欺
天其厭旒孟聞諸伋程聞諸孟伋聞諸參參聞諸
聖聖也折薪疇荷其重程也執柯實曾其冢孰冢

平程紫巖先生紫巖有子紫巖是似紫巖南軒胥
為後前聖域有疆南軒拓之聖門有鑰南軒廓之
聖田有秋南軒穫之我稼在圃其教士女其饗有
昊其烝皇祖云胡不淑上天雨霜嘉穀既零我心
孔傷孰琢我璞孰斤我聖孰疾我藥九京不作豈
我之私吐失母慈士失宗師邦失倚毘己乎南軒
不考其年不遐其騫天胡云然延顏之光揭孟之
芒昭回彼蒼公未或士歲在辛卯格門諸離相從
濠梁白首為期誰謂此別是日永訣淚盡眼枯續
之以血嗚呼哀哉尚饗

祭葉夫人文

嗚呼結緣懸壺生於玉山火齊照乘出於龍淵世
無賢母安得賢子山淵鬱葱珠玉是似於穆夫人
禮儀閑閑圖史拳拳言德安吉蠲蘋繁肅離佩
環訓子其勤建家其艱式洪其源式崛其門象服
脂田龍光便蕃中庭有蘭中堂有萱豈曰家慶衣
冠之盛壽母之頌彤管之風變為蓼莪其誰弗恫
其昔與賢子同科同舍東頤西應志無殊者升堂
拜母此禮未陳生芻一束哭以斐尚饗

嘉定元年春三月男

長孺

編定

端平元年笈五月門人羅

茂良

校正

誠齋集卷第一百一終

誠齋集卷第一百二

雜著

廬陵揚

万里

廷秀

祭文

祭王丞相文

嗚呼昔歲云秋公在里居問焉以書答焉劬愉今
春云暮公在堊室唁焉以筆哀不能答八月中潘
我來自西次于上饒聞公迎醫九月之九言至都
下則聞公薨驚涕以雨爰自乾道壬辰仲冬刺經
頌臺我初識公公為貳卿我則負丞葭玉六拙傾

豁悃誠公自此升雲騫漢騰我自此退契闊一星
我再卽署公宅元輔肯親今踈遐不媚附俗異且
喜公驩不疑不寧不疑以此予知暨塵府掾夙宵
幕辨猶有違從慙無舒捲俗忤且憎公和且平以
水濟水曷曰作義繫公秉心曠曠昭廓不渾不搖
清水喬嶽孰無畎疆公坦以同孰無府城公開以
通孰無邊幅公抑以恭孰無色辭公粹以融近世
數公豈無賢哲匪才之矜以量為悅公之在位或
者公誹公既云亡疇不公思彼誹彼思公則不計
公存公亡邦之珍瘁知舊眇然悼以其私人物眇

然悼以其誰繫官于朝莫往弔之言寄一觴公尚
醕之尚饗

祭衛大著母夫人文

傷哉夫人胡年之不長尚其家之昌其又奚傷粵
自來嬪洵懿且仁相其良人學以發身瞻彼庭堦
蘭玉其相追琢成璋于晁董有光金馬承明選雋
堰英匪我舉首疇冠著庭英英參卿夫也金陵皇
皇使星子兮山陰彫軒互迎蕩節斯征兩地望塵
有螿佩聲盍百其年觀厥蜚騫隔座後先榮光相
宣古凡有喪尚力以救矧友之疚若之何不弔伯

齋吾察阿戎吾朋父子之間皆吾弟兄升堂之拜
蹉跌至此生芻之奠必恭敬止尚饗

祭劉諤卿知縣文

嗚呼公之文足以追前修而口不置後進之片善
面折人過而退則稱其長當於古求今也則亡權
輿一官百不一試改秩方新如斯其逝嗟乎痛哉
與大尹爭是非寧使其上官面頸發赤以直一夫
強死之命今尚有此決曹掾也耶以部使者之尊
而欲薦公公則不屑其人而不願出其門謝其薦
書而不受今尚有此不負丞也耶今求斯人姑置

是事惓惓有懷懷我知已我始徒步摯文謁公辱
公鑒裁拔之徒中謂彼珠璧寶不難得惟此人才
可珍可惜始則教育使潰于成終焉永好重以昏
姻赴告忽來失聲有慟儀形堂堂吾不復夢民失
慈母國失高賢士失主盟我失二天漬繇千里寓
哀嘉肯公乎聞乎一訣永已嗚呼哀哉尚饗

祭十三叔母文

某幼而無母壯而喪父老而哭繼母烝烝余生未
即死者有叔父而猶父有叔母而猶母也歲有已
酉天奪我叔父今茲天又奪我叔母未死之身其

將疇依天平痛哉天平寬哉恭惟叔母大孺人女
德柔惠婦職孝敬母道宜慈生膺恩封年享九齡
子孫盈庭相傳詩禮復何憾焉誰云壽觴寢為首
酒嗚呼哀哉尚饗

祭朱侍講文

嗚呼我未識公得之欽夫云今傑鬼舍公則無我
初識公玉山道間我病補外公徵入闕平生相聞
恨不相識既曰識只一見相得我欲從公臨水登
山萬仞峯頭携筇捫天揭取北斗酌海為酒染雲
為裳翦霞為袖海波若乾更借銀河二老醉倒頻

足浩歌天不誘衷室人癘疾此意莫遂適及私室
猝猝一見握手絕倒借曰不款亦慰懷抱自此與
公好如弟昆我齒兄公公賢我先途來二老年各
七秩告老之章彼此若一念欲命駕千里訪公尋
盟玉山一快我悰有昊降割曾不愁遺奪國忠賢
奪我友師赴告至止一慟欲死已乎元晦吾道已
矣訣不公面哭不公聞生芻一束以瀝我肝嗚呼
哀哉尚饗

又祭十三叔母文

嗟我先妣叔母其妣嗟我繼妣叔母其弟二妣棄

我我生榮然有叔母在如母存焉有昊降割又奪
叔母疾哉余生何恃何恃豈無骨肉莫非後來母
黨盡矣云胡不哀有餽其俎有冽其酒一觴送飯
云胡不舉自此永訣千年不晨仰瞻空堂有淚盈
巾嗚呼哀哉尚饗

祭太師文忠公京左相文

嗚呼我聞公名十年之先我守荆溪公察朝端我
泚一書公答拳拳我識公面十年之後偕掾公府
我左公右公使朔狄我出筠守自此一別不再盍
簪十三年間一昇一沉公冠台鼎我老山林公使

猶時大節玉立公以哀往彼以娛接夷樂雷起花
帽雲集日肝肉乾公辭秩筵以死自誓挽之不前
金節來飯名重於山公飯自蜀逢國多故

孝祖上賓 聖考違豫手執日轂安駕皇路襄我
皇德天清目光妥我國勢鼎安岱昂諧我廷紳鳳
鳴鸞踰如公忠賢與國永肩與川流禧與椿流年
善人怙焉斯民仰旃秋氣將半望舒將團未團一
縷公薨式遄誰歟不仁隕我維垣維垣之位文忠
之謚 上恩疊雙不請而至他人敢承公則無媿
嗟我與公同居江西分第鄉友情如孔懷我老乞



骸公曠睫眉謂我之齒盤古所稀身猶康強毋遽
日飯三請乃白帝其允茲聞公反柩已達維梓我
以老病不克言只寓辭往真有淚如水嗚呼哀哉
尚饗

祭余丞相文

六七月間客來自南咄咄怪事有駭其談南斗之
側文星載昱一夕砰然震于嶽麓南嶽之巔天柱
一峯同日亦摧震于湘中匪峯則摧匪星則震丞
相余公薨于潭乎星精嶽靈既銷既零奪氓之母
奪國之英吾聞其語淩下如雨知音云亡流水誰

御溥熙季年 光宗潛淵公為宮詹我忝經筵慶
元元祀 皇上嗣位公為左揆我以病廢公在華
門如商甘盤如楚士為如漢綺園金得砥石木得
繩墨鳳得羽翼諒我 皇德公在宰廷揚綰之清
君寶之正子明之平補天不圻目不側支屢不踣
定我王國 帝曠方隆 帝任方崇翩然去之歸
雲冥鴻 帝再起之保釐南紀惠然肯來周邦咸
喜云何不淑我民不天天曷降割騎箕而僊卿弔
于朝士弔于野工弔于市農弔于社我本狂者深
山野夫溥熙十二逢公中都公為侍郎我在郎署

同省異曹一見殊顧中都金陵一再為僚心則斷
金情則同胞有酒呼我有詩和我一別雲散公升
我隨公相我皇拔茹無方巖抹結綠淵漉夜光
慨彼雲網愁我長徃搜林別藪下逮草莽病夫掩
高再勤弓旌招之不來寘彼西清君恩天覆病
夫非據微公之故胡為乎天路天乎至此吾道已
矣東望一慟絕而後起嗚呼哀哉尚饗

祭趙民則提刑少監文

嗚呼淳熙季年天區丕平文傑武夷鳳翽鸞停
孝宗當宇顧瞻在廷孰為有賢孰為左親孰為宗

盟帝省其名周諏九賓獨無為城天顏不怡爰詔
途臣麟趾之良各舉二人肅肅蕭蕭公台斗宣精有
鶻其表先生是親王言如綸擢貳匠卿來儀筭班
其人玉冰咸屬之月老成典刑崇論川流名章霜
清談者推表雙止德麟世無東坡孰價厥珍人為
國賀公則我輩我武丹墀我心白雲月戢風呻猿
崖鷺汀帝留不能出節湘衡荐讞庶獄于彼甌閩
琚瑤珩璜大鏘取鳴陶謝焚泓甫白收聲竟解其
組飯卧柴荆鳳山其嶸錦江其瑋穎濱之神山谷
之靈于昏斯朋于昏斯賡劍池之藁丹井之醜我

以吾醒一世仰止鴻飛冥冥既吾其福盍千其齡
有比者風吹彼盡心維孟之夏辰乎何辰月弔其
弦奄奠兩楹門人小子施若涕零高安語離條逾
一星誰謂此別契閻死生走也老矣維疾之嬰終
幕遠而罔克駿奔有漬其絲有絃其觥有漚其恫
先生是聽嗚呼哀哉尚饗

祭西和州太守陳師宋文

嗚呼淳熙之季我守高安小邦槁乾遠民勤艱慨
莫助之同流上恩郭內之邑有宰則賢辨訟也恕
治賦也寬民氣穆如民譽藹藹然情也及僚未暮其

年我召君滿君後我先復會中都義均弟昆屢以
治行升聞于天言輕乎羽推之不前竟老于外不
登不騫君歛自西屢書相温屬間先驅于征塞垣
再竹其符再朱其輔如何不淑一夕九原總章祀
梓廟于尺椽太宮玉璫委諸瓦盆才難豈然用之
惟難我欲徃弔弗駿克奔有生者芻有漬者絲式
寫我哀式招君魂嗟嗟師宋英爽若存嗚呼哀哉
尚饗

再祭余處恭左相文

嗚呼瞻彼日月如環斯循倏然而夜忽然而晨曾

是斯人乘此大化忽然而晨倏然而夜晨夜之間
又有縮羸回縮而折陌羸而伸有偉郇公金玉在
躬潛天之學格天之功我學淵閱我功變乎而不
百年止乎耳順唐盛開元實相韓休十月而去莫
之與留宋隆康定杜公實相五月月而去王室用
世俾彼慶元左輔惟公暮年而去皇基用崇三君
子者進退雅雅奚以久為暮月可也不久且然况
歷其年使克永弼作虞孚先昔歲公薨及柩宅里
病不克弔遣倩塗祭今公塋期况曹未飯病不克
送老涕其而一以詩悼兩以此誄箕尾之光三燭

于位嗚呼哀哉尚饗

祭王謙仲樞使文

嗚呼淳熙作噩我守荆溪公職璧水一見異知厥
後八載公為小宰我入郎署刮目相待自此投分
以漆傳膠顧我奚取辱公定交歲在涪灘我以鱖
出公尹豫章館我勤郵來歲之冬我長道山公持
釣樞再見解顏我既子立公亦孤峙寒栖獨巢昏
存昏尉其後一年我使江東公飯淮堧尊酒再同
夜闌秉燭追驩不足一揖而別日月轉轂誰謂此
別遂千其秋忽聞公薨我淚滂流 孝宗季年本

又八極遠併正觀近踵慶曆儀儀衆賢金海玉洲
孰為之宗未或公先有誇其儀有教其色伯夷之
清史魚之直作

帝耳目作

帝股肱上所深

知下所深憎

帝有合官公其梁棟

帝有靈固公其麟鳳晚卧霞外風哦月嘻手折若
木濯纓咸池身潛名起人望靡已盍畝手來襄我
明世赴告驛聞善人失聲玉折蘭摧嵩隴低頌嗟
我老矣沉痾垂死云胡不天又哭知己千里命駕
已負此期一束生芻弗躬致之滴淚清墨以寫哀
此一个行李執諸靈座嗚呼哀哉尚饗

祭益國周夫人王氏文

嗚呼肯謝文靖方在東山其儷居之能無歉然昔
向文簡方受書贊其儷居之載績晏晏賢聖通塞
局闕其身閨門戚忤則艱其人卓哉益公萬邦是
式懿哉夫人婦道維則公之未相夫人敬之案過
其眉匪直與齊公之既相夫人安之匪直載績澹
如平時有魚其軒有象其服其在廟朝如在巖谷
退飯午橋有漁有樵其在巖谷如在廟朝匪疾跌
匪哽匪體儵然而往如蛻如蛻年七其秩不日不
齡國崇其不日不榮有斐君子而不偕老有遠過

庭自公所召心乎不羸神乎不瞑此外奚憾神乎
上征乘彼白雲波彼織女臨睨人寰積蘇塊土嗚
呼尚饗

祭周益公丞相文

維皇宋嘉泰四年歲次甲子十月庚寅朔越十一
日庚子具位揚某謹以清酌之奠致祭于迓故致
政少傅大觀文左丞相國公之靈嗚呼六七月間
聞公屬疾欲徃問安我疾方棘曾未幾何聞公有
廖尚捕鴻文以應人求云胡一夕而遽不起嗚此
哲人騎彼箕尾乾扞天柱坤墮岱嵩國虧股肱道喪

師宗天乎痛哉一老不慙自家徂邦聞者涕隕公
自紹興奮繇諸生獨提一筆萬人莫撓遂收雙科
遂入三館遂掌絲綸遂首輔贊中興以還孰冕詞
臣維汪龍溪學士曰真公出其後而出其上發
帝之令有一無兩 高皇倦勤遜于 孝宗託

子者誰維陳魯公 孝遜于 光疇續陳者公扶

日轂以照天下昔漢董賈玉映文事彼豈不文文
而不位昔唐房杜星垂相勲彼豈不位位而不文
維文維位公俱其尤其詞典謨其勲伊周齡甫七
十健若霜鷗而挂其冠而還其笏畝于午橋爭席

漁樵岫遨川嬉風哦月謠酒舩淋漓詩陳跌宕九
老非高七賢未放赤松之從公其前而蟠溪之耄
公其肩而汾陽之社公其全而神清之蛻公其仙
而公一無憾我心孔悲殄瘁之傷豈我之私嗚呼
哀哉尚饗

嘉定元年春三月男長孺編定

端平元年笈五月門人羅茂良校正

誠齋集卷第一百二終

第 35382 号

平成 3.11.22

聖和學
園短大
圖書館

928

七

23

